

KONTZERTU EKONOMIKOA

Negoziatzen jarraitzeko denbora dagoela adierazi dute EAJk eta EAK

Madriren «beste eraso» bat dela esan du Batasunak, eta PPK eta PSEk egoera larria dela

Erredakzioa | DONOSTIA

Kontzertu Ekonomikoaren negoziazioen haustura PPren gobernuari egotzi eta adosteko denbora dagoela esan zuten EAJk eta EAK. Batasunak «erasotzat» jo zuen, eta PPK eta PSEk deitoratu egin zuten.

JOSEBA EGIBAR (EAJren bozeramailea)

«Aznarrek ez du barkatu euskal herritarrek berari bizkarra eman izana»

Akordiorik eza Aznarri egotzi zion Egibarrek: «Ez du barkatu euskal herritarrek maiatzaren 13an berari bizkarra eman izana». Akordiorik eza «itun politiko baten hausturatzat» jo zuen eta negoziatzeko denbora badagoela esan. EAEn «jarrera apartekoa izan da», esan zuen.

JAIME MAYOR OREJA (PPko presidentea Eusko Legebiltzarrean)

«Subiranotasunaren alde jo du Jaurlaritzak»

Mayor Orejak «guztiz larritzat» jo zuen egungo egoera. Negoziazioen haustura «iragarritako krisi baten kronika» dela esan zuen. Jaurlaritzak «hausturaren estrategiari men egiteko interes berezia» zuela deritzo. «Subiranotasunaren aldeko apustuari eustea erabaki du, Lizarrarena, epekako hausturarena», adierazi zuen.

RODOLFO ARES (PSE-EEko Exekutibako koordinatzailea)

«Ezin da onartu negoziatzeko aukera guztiak ez agortzea»

«Ezin da onartu gobernatzeko ardura dutenek negoziatzeko

aukera guztiak ez agortzea», esan zuen Ares. Egoera larritzat jo zuen, baina negoziatzen segitzeko denbora badagoela gaineratu zuen. Erkidegoek Europar parte hartzeko aukeraz, Kontzertutik kanpo negoziatu behar dela deritzo.

RAFAEL LARREINA (EAKo Antolakuntza idazkaria)

«Luzapena onartezina da juridikoki»

«Negoziatu egin behar da, akordio on bat lortzeko», esan zuen Larreinak. Kontzertuaren luzapena «arduragabekeria politikoa izateaz gain, onartezina da juridikoki», gaineratu zuen. EAEk ere Kontzertua luzatzeko legea egin dezakeela ohartarazi zuen. Egoera hori, baina «instituzionalki oso larritzat» jo zuen EAKo ordezkariak.

ARNALDO OTEGI (Batasuneko bozeramailea)

«EAJren bidea antzua dela erakusten du»

Madrilgo «erasoaren» aurrean, jarrera bateratua hartzeko dei egin zien indar politiko, sozial eta sindikalei. Espainia gai bada «alde bakarrek erabakiak hartzeko, horrek erakusten du EAJk duela 20 urte hasitako bidea antzua dela», azaldu zuen. Otegiren aburuz, euskal herritarrek gai dira bere errekursoak gestionatzeko eta hori «subiranotasunaren ikuspuntutik egin daiteke soilik».

CONFEBASK

«Akordiorik eza deitoragarria da»

«Akordiorik eza deitoragarria eta etsipengarria da, EAEko etorkizunerako sor daitezkeen itzalengatik», esan zuen Confebaskek ohar batean. Luzapenak «juridikoki segurtasun eza eragingo du, adostasuna hausten duen ezohiko mekanismoa sartu delako». Zera galdetu zuen: «Noraino eraman nahi da herri hau, Kontzertuaren historian ezohiko egoera bat eragin nahi denean?».

ELA

«Erantzun politikoa eskatzen du»

«Estatuaren inposaketa da eta horrek erantzun politikoa eskatzen du», adierazi zuen ELAk ohar batean. Kontzertua luzatzeko erabakiarekin Espainiak «bere kriterioak inposatzen ditu, autogobernuaren beste arloetan egiten ari den bezala». ELAk garrantzitsutzat jo zuen euskal instituzioek Europar parte hartzea, «egun Espainiak ukatzen duena, alegia».

LAB

«PPren inposaketaren adibide garbia da»

LAB sindikatuak idatzi batean azaldu zuenez, «PSOEk onartu eta PPK aurrera eramaten duen inposizioaren adibide garbia da» akordiorik eza. Espainiaren alde bakarrek erabakiarekin, «Estatutuan oinarritutako autogobernuaren egitura guztia bertan behera gelditu da». Euskal Herria «ezegonkortzeko mehatxua bete du PPK», adierazi zuen LABek.

ERREAKZIOAK

JAVIER MADRAZO

(EB-IUko koordinatzailea)

«PPk ezerezean utzi nahi du Kontzertua»

JOSEBA AZKARRAGA

(Lan eta Justizia sailburua)

«Ituna dagoenean, ezin da alde bakarrek hausturarik izan»

CARLOS ITURGAITZ

(PPko presidentea EAEn)

«Akordio ezak EAJren independentziaren aldeko estrategiari erantzuten dio»

J. IGNACIO DEL BURGO

(UPNko diputatua)

«Aldundien aurrean Jaurlaritzak kontrasuaz jokatu du»

J.L. RODRIGUEZ ZAPATERO

(PSOEko idazkari nagusia)

«Bi aldeek dute ardura negoziazioaren hausturan»

JOSE GUILLERMO ZUBIA

(Confebaskekko idazkari nagusia)

«Europako ordezkariarena ez da nahikoa arrazoi»

EAE-KO ENPRESARIEN ZIRKULUA

«Ulermen ezak arduragabekeria larria erakusten du»

CARLOS TREVILLA

(UGTko idazkari nagusia)

«Kalte egiten dio euskal gizarteari, gatazka politiko bat helarazten zaiolako»

ANTTON MARQUET


(Gipuzkoako Ogasun diputatua)

«Prest gaude negoziatzen segitzeko»

PEDRO SOLBES

(Ekonomia eta Diru Gaietarako komisarioa)

«Europar ordezkariaren eskatzeak ez du zentzurik»



DAVID AGUILAR / EFE

Rafael Larreina, Joseba Egibar eta Antton Karrera, herenegun, Eusko Legebiltzarrean.

Ekarpen Legearen luzapena onartu du Legebiltzarrak

Erredakzioa | GASTEIZ

Eusko Legebiltzarrak Ekarpen Legea luzatzeko proposamena onartu zuen atzoko osoko bilkuran. EAJ, PSE-EE, EA eta EB-IUren aldeko bozak izan zituen proposamenak. PPK zuri bozkatu zuen.

Araba, Bizkaia eta Gipuzkoako aldundiek EAEko ogasun orokorrerako bideratu behar duten diru kopurua finkatzeko sistema zehazten da Ekarpen Legearen bidez. Bost urteko iraupena du, eta aurrean azkena zuen. Haatik, Kontzertu Ekonomikoarekin negozia-

zioarekin harreman zuzena zuenez, lege berriaren eztabaida atzeratzea adostu zuten iragan urrian foru aldundiek eta Eusko Jaurlaritzak.

Bozketaren aurreko eztabaida Kontzertu Ekonomikoarekin jazotakoaren ispilu bihurtu zen. Idoia Zenarruza-beitia lehendakariordeak eta Antonio Danborenea PPko legebiltzarkideak eztabaida beroa izan zuten, Kontzertu Ekonomikoaren karietara.